

Nd.

19. Fyrirspurn

til ríkisstjórnarinnar varðandi framkvæmd annars tölulíðar laga nr. 58 frá 3. marz 1945, um verðlag landbúnaðarvara.

Flm.: Páll Zóphóníasson, Bjarni Ásgeirsson, Eysteinn Jónsson, Sveinbjörn Högnason.

Hvaða ráðstafanir hefur ríkisstjórnin gert til þess, að framfylgt verði ákvæðum laga nr. 58 frá 3. marz 1945, um uppbætur á endanlegt verð landbúnaðarvara, seldra á tímabilinu frá 15. sept. 1944 til 15. sept. 1945, og hvenær hyggur ríkisstjórnin, að framleiðendur fái þessa lögakveðnu uppbót?

Greinargerð.

2. tölulíður bráðabirgðaákvæða laga nr. 58 frá 3. marz 1945 hljóðar svo:

„Verði hækkun á kaupgjaldi á tímabilinu 15. sept. 1944 til 15. sept. 1945, sem áhrif hefur á vísitölu landbúnaðarafurða eða vinnslu og sölukostnað þeirra samkvæmt útreikningi hagstofunnar, skal verðlagið hækkað í samræmi við það. Breytingar þessar skal hagstofan reikna út fyrir lok tímabilsins, og skulu þær teknar til greina, þegar verðlagið er gert upp.“

Það er vítað, að á tímabili því, sem um ræðir í tölulíð þeim, sem tilfærður er hér að ofan, hefur vísitala landbúnaðarafurða hækkað úr 109,4 í 120, eða um 9,7%. og er víst, að tölvert af þeirri hækkun á samkvæmt greininni að koma fram í hækkuðu verði á landbúnaðarafurðum, sem seldar voru á umræddu tímabili. Auk þess hefur kostnaður við vinnslu og dreifing varanna hækkað, en sá kostnaður kemur ekki fram í landbúnaðarafurðavísitölunni, og má þar benda á aukinn kostnað við dreifingu mjólkur o. fl. Verð á kindakjöti hefur nú verið gert upp við framleiðendur víðast hvar fyrir nefnt tímabil, og verð mjólkurinnar að nokkru leyti, og hefur hvergi verið tekið tillit til þeirrar verðhækkunar, er leiðir af þessari grein. Eftir henni áttu uppbætur eða niðurgreiðsla ríkisins að hækka sem næmi hinum aukna tilkostnaði, og var hagstofunni falið að reikna út, hve miklu það næmi, en sá útreikningur mun ekki liggja fyrir enn.